

古今說海 第二冊



古今說海

遼志

說選十 偏記七

本末

契丹之始也。中國簡冊有所不載。遠夷草昧。復無書可考。其年代不可得而詳也。本其風物。地有二水。曰地乜里沒里。復名陶猥思沒里者。是其一也。其源出自中京西馬盂山。東北流。華言所謂土河是也。曰曷羅個沒里。復名女古沒里者。又其一也。源出饒州西南。平地松林。直東流。華言所謂潢河是也。至木葉山。合流為一。古昔相傳。有男子乘白馬。浮土河而下。復有一婦人乘小車。駕灰色之牛。浮潢河而下。遇於木葉山。顧合流之水。與為夫婦。此其始祖也。是生八子。各居分地。號八部。落。一曰祖。皆利部。二曰乙室語部。三曰實活部。四曰納尾部。五曰顛沒部。六曰內會雞部。七曰某解部。八曰奚嗚部。立遺像於木葉山。後人祭之。必刑白馬。殺灰牛。用其始來之物也。後有一主。號曰迺呵。此主特一髑髏。在穹廬中。覆之以氊。人不得見。國有大事。則殺白馬灰牛以祭。始變人形出視事。已即入穹廬。復為髑髏。因國人竊視之。失其所在。復有一主。號曰嗚阿。戴野猪頭。披野猪皮。居穹廬中。有事則出。退復隱入穹廬如故。

後因其妻竊其猪皮遂失其夫莫知所如。次復又一主畫里昏呵。惟養羊二十口。日食十九。留其一焉。次日復有二十口如之。是三主者皆有能治國之名。餘無足稱焉。異矣哉。氈中枯骨。化形治事。戴猪首。服豕皮。罔測所終。當其隱入穹廬之時。不知其孰為之主也。孰為之副貳也。荒唐怪誕。詭以傳記。遂為口實。其詳亦不可得而詰也。自時厥後。牛馬死損。詞訟龐淹。復遭風雨雪霜之害。中遂衰微。八部大人。後復稍整兵。三年一會。於各部內。選雄勇有謀略者。立之為主。舊主退位。例以為常。至阿保機為眾所立。後併七部而滅之。契丹始立。其國大原。興自阿保機。至耶律德光而漫盛。遭五季之衰。天未厭亂。石晉胎釁。產禍諸華。毒痛四海。飛揚跋扈。貪殘僭擬。中國帝王名數盡盜有之。冠履倒植。薰蕕共染。干戈之慘極矣。迨宋真宗屈已和戎。不復以一矢相加。含容覆護。百有餘年。聖興道三主以來。天誘其衷。革心慕義。貪婪歲幣。顧惜盟好。銷鋒寢析。號稱無事。南北皆不知兵。各保首領。以沒茲非以德懷遠之明效。與祖宗列聖之德。可謂至哉。若遼之威服諸夷。奄有金燕。何其強也。天祚昏庸。女真啓心。深入一呼。土崩瓦解。何其弱也。且兵者不祥之器也。天道好還。盛極而微。理固然也。故其興也勃焉。其亡也忽焉。悲夫。今據舊聞。窺其本末。雖未能考其異而訂其

同。要之大略其不相遠。後之英主忠臣。志欲溯今。洄古。可以為鑒矣。

族姓原始

契丹都部族。本無姓氏。惟各以所居地名呼之。婚嫁不拘地。里至阿保機。變家為國之後。始以王族號為橫帳。仍以所居之地名曰世里。著姓世里者。上京東二百里地名也。復賜后族姓曰蕭氏。番法。王族惟與后族通婚。更不限以尊卑。其王族后族二部落之家。若不奉北主之命。皆不得與諸部族之人通婚。或諸部族私相婚嫁。不拘此限。故北番惟耶律蕭氏二姓也。

國土風俗

契丹國。在庫莫奚東。唐所謂黑水靺鞨者。今其地也。有七十二部落。不相統制。好為寇盜。父母死而悲哭者。以為不旺。但以其屍置於山樹上。經三年後。方取其骨而焚之。因酌酒而祝曰。冬月時。面陽食。我若射獵時。使我多得豕鹿。其無禮頑。器於諸夷最甚。其風俗與奚靺鞨頗同。至阿保機。稍并服諸小國。而多用漢人。漢人又教之以隸書。半增損之。作文字數千。以代刻本之約。又制婚嫁。置官號。稱皇帝。

部落

漢時為匈奴所破。保鮮卑山。魏青龍中部酋為王雄所殺。眾遂逃橫水之南。黃龍之北。至元魏自號曰契丹。在唐開元天寶間。使朝獻者。無慮二十。故事。以范陽節度為押奚契丹使。至唐末。契丹始盛。

併今部落

初契丹有八部。族之大者曰大賀氏。後分為八部。部之長號大人。而常推一人為王。建旗鼓以統八部。每三年。則以次相代。或其部有災疾。而畜養衰耗。則八部聚議。以旗鼓立其次而代之。被代者以為元約如此。不敢爭。及阿保機乃曰。中國之王。無代主者。由是阿保機益以威制諸國。不肯代。其立九年。諸部共責請之。阿保機不得已。傳其旗鼓。而謂諸部曰。吾立九年。所得漢人多矣。吾乃別自立一部。以為漢城可乎。諸部許之。漢城在炭山。東灤河上。有鹽鐵之利。乃後魏滑鹽縣是也。其地可植五穀。阿保機率漢人耕種。為治城郭。邑屋廛市。如幽州制。漢人安之。不復思歸。阿保機知眾可用。用其妻述律策。使人告諸部大人曰。我有鹽鐵之利。諸部所食。然諸部知食鹽之利。而不知其鹽有主人。可乎。當來犒我。諸部以為然。共以牛酒會鹽池。阿保機伏兵其旁。俟其酒酣。伏兵發。盡殺諸部大人。復併為一國。東北諸夷皆畏服之。

兵馬制度

晉末契丹主部下兵。謂之大帳。有皮室。兵約三萬騎。人皆精甲兵也。為其爪牙。國母述律氏部下。謂之屬棚。有眾二萬。是先成主阿保機牙將。半已老矣。每南來時。量分借五千騎。述律氏常留數百兵。為部落根本。其諸大酋。領太子偉王永康。南北王子趙麻答五押等。大者千餘騎。次者數百人。皆私甲也。別族則有奚霫。勝兵亦千餘人。少馬多。又渤海有海酋。領大舍利高模漢兵。步騎萬餘人。並髡髮左衽。竊為契丹之飾。復有近界韃靼。於厥里室韋女真黨項。亦被宵屬。每部不過千餘騎。其三部落吐渾。以陁陌幽州管內。鴈門以北。千餘軍州部落兵。合三五萬餘眾。此是石晉割賂契丹之地。番漢諸族。其數可見矣。每契丹南侵。其眾不啻十萬。國主入界之時。步騎車帳。不從陁陌東行。一槩而行大帳前。及東西面。差大酋領三人。各率萬騎。支散游獵。百十里內外相覘邏。謂之欄子馬。戎主吹角為號。眾則頓舍環遶穹廬。以近及遠。折木稍屈之。為弓子輔。不設槍營塹柵之備。每行軍聽鼓三伐。不問昏晝。一布便來。行逢大敵。不乘戰馬。俟近敵師。即競乘之。所以新羈戰馬。蹄有餘力。其用軍之術。成列而不戰。俟退而乘之。多伏兵。斷糧道。隨冒夜舉火。上風曳柴。積餉自齎。退敗無耻。散而

復聚寒而益堅此其所長也

建官制度

賤他姓貴耶律蕭氏二姓其官有契丹樞密院及行官都總管司謂之北面以其在牙帳之北以主番事又有漢人樞密院中書省行官都總管司謂之南面以其在牙帳之南以主漢事其陽隱宗正寺也夷离畢參知政事也林牙翰林學士也夷离中刺史也內外官多倣中國者其下佐吏則有敝史本古思奴古都奴古徒奴古分領兵馬則有統軍侍衛控鶴司南王北王奚王府王帳分提失哥東西都省太師兵又有國舅幹轄膳遙輦宸袞諸司南北皮室二十部族節度頻必里九克漢人渤海女真五節制五治火師一百六百九百家矣凡民年十五以上五十以下皆籍為兵時舉兵必殺炙牛白馬祠天地及木葉山神鑄金魚符調發兵馬其從馬及傳命有銀牌二百軍所舍有遠探欄子馬以夜聽人馬之聲每其立眾所得人戶馬牛金帛及其下所獻牲口或犯罪沒入者別為行官領之建州縣置官屬既死則設大穹廬鑄金為像朔望節辰忌日輒致祭築台高丈餘以盆焚食謂之燒飯

宮室制度

十宮各有門戶。出兵馬。阿保機曰洪義宮。德光曰永興宮。元欲曰積慶宮。述律曰延昌宮。明記曰章敏宮。突欲曰長寧宮。燕燕曰崇德宮。隆緒曰興聖宮。隆慶曰敦睦宮。隆運曰文忠宮。王府又有四樓。在上京者曰西樓。木葉山曰南樓。謂化州曰東樓。唐州曰北樓。凡受冊。積柴升其上。大會番夷其下。已乃燔柴告天。而漢人不得預。有譚子部百人。夜以五十人番直。四鼓將盡。歌於帳前。號曰聒帳。每謁木葉山。即射柳枝。譚子唱番歌前導。彈胡琴和之。已事而罷。

衣服制度

國母與番官。胡服。國主與漢官。即漢服。番官戴氍冠。上以金華為飾。或以珠玉翠毛。蓋漢魏時遼人步搖冠之遺像也。額後重金花織成夾帶。中貯髮一總。服紫窄冠。帶以黃紅色條裏革為之。用金玉水晶碧石綴飾。又有冠如紗帽。無簷。不撒雙馬。額前綴金花。上結紫帶。末綴朱或紫阜。幅巾紫窄袍束帶。丈夫或綠中單。綠花窄袍。中單多紅綠色。貴者被貂裘。以紫黑色為貴。青色為次。又有銀鼠。尤潔白。賤者被貂毛羊鼠沙狐裘。弓以皮為弦。箭削櫟為幹。鞞勒輕快。便於馳走。以貂鼠或鵝頂鴨頭為捍腰。宋真宗景德中。太常博士王曙。戶部員外郎李維。往賀國主生辰。還言國主見漢

使。纁服衣冠。纔已。即帳中。雜番騎。出郊射獵矣。

漁獵時候

每歲正月上旬。出行射獵。凡六十日。然後並捷魯河鑿水釣魚水畔。即縱鷹鷂以捕鵝鴈。夏居炭山。或上京避暑。七月上旬。復入射鹿。夜半。令獵人吹角。倣鹿鳴。鹿既集而射之。宋真宗時。遣使往賀生辰。還言。始至長泊。泊多野鵝鴨。國主射獵。領帳下騎擊扁鼓遶泊。驚鵝鴨飛起。乃縱海東青擊之。或親射焉。國主皆佩金玉錐。號殺鵝宰鴨錐。初獲。即拔毛挿之。以鼓為坐。遂縱飲酒醉。以此為樂。又好以銅及石為槌。以擊兔。每秋。則衣纁裘。呼鹿射之。夏月。以布為纁帳。籍毬圍碁。雙陸。或深澗洗鷹。

試士官制

太祖龍興朔漠之區。倥傯干戈。未有科目。數世後。承平日久。始有開闢制限。以三歲有鄉村省三試之。設鄉中曰鄉薦。府中曰府解。省中曰及第。時有秀才未願赴者。州縣必報刷遺之程文。分兩科。曰詩賦。曰經義。魁各名分焉。三歲一試進士。貢院以二寸紙書及第者姓名給之。號喜帖。明日。舉按而出。作樂。及門。擊鼓十二面。以法雷震。殿試臨期。取旨。又將第一人特贈一官。授奉直大夫翰林應制。奉文字。第二人。第三

人止授從事郎。餘並授從事郎。聖宗時止以詞賦法律取士。詞賦為正科。法律為雜科。若夫任子之令。不論文武並奏。蔭亦有員數。

歲時雜記

正旦

正月一日。國主以糯米飯。白羊髓相和為團。如拳大。於逐帳內各散四十九個。候五更三點。國主等各以本帳內牕中擲米團在帳外。如得雙數。當夜動番樂飲宴。如得隻數。更不作樂。便令師巫十二人。外邊遶帳。撼鈴執箭唱叫。於帳內諸火爐內爆鹽。并燒地拍鼠。謂之驚鬼崇。帳人第七日方出。乃解穰之法。北呼此謂之嬭担離。漢人譯云。嬭是丁。担離是日。

立春

立春日。婦人進新春書。以黃繒為幟。刻龍像銜之。或為蝦蟆。

人日

人日。京都人食煎餅於庭中。俗云薰天。未知何所從出也。

中和

二月一日。大族姓蕭者。並請耶律姓者。於本家筵席。此節為瞎里忒。漢人譯云。瞎里是請。忒是時。

上巳

三月三日。國人以木雕為兔。分兩朋。走馬射之。先中者勝。其負朋。下馬跪奉勝朋人酒。勝朋於馬上接盃飲之。北呼此節為淘裏化。漢人譯云。淘裏是兔。化是射。

佛誕日

四月八日。京府及諸州縣。各用木雕悉達太子一尊。城上昇行。放僧尼道士度民。行城一日為樂。

端午

五月五日午時。採艾葉與綿相和。絮衣七事。國主著之。番漢臣僚。各賜艾衣三事。國主及臣僚飲宴。渤海厨子進艾糕。各點大黃湯下。北呼此時為討賽離。又以雜絲。或綠結合歡索。纏於臂膊。婦人進長命縷。宛轉皆為人像。帶之。

朝節

夏至日。婦人進扇及脂粉囊。謂之朝節。

三伏

六月十八日。大族耶律姓。並請蕭姓者。亦名瞎里耐。

中元

七月十三日夜。國主離行宮。向西三十里。卓帳。先於彼處造酒食。至十四日。一應隨從諸軍。並隨部落。動番樂。設宴至暮。國主卻歸行宮。謂之迎節。十五日。動漢樂大宴。十六日早。卻往西方。令隨行軍兵人大嗽三聲。謂之迎節。此節謂賽離拾。漢人譯云。賽離是月。拾是好。是月好也。

中秋

八月八日。國主殺白犬於寢帳前七步。埋其頭。露其嘴。後七日。移寢帳於埋狗頭上。北呼此節為袒褐嫺。漢人譯云。袒褐是狗。嫺是頭。

重九

九月九日。國主打團斗射虎。少者輸。重九一筵席。射罷於地。高處卓帳。與番漢臣登高。飲菊花酒。出兔肝。切以生鹿舌。拌食之。北呼此節為必里遲離。漢人譯之云。九月九日也。又以茱萸研酒。洒門戶間辟惡。亦有入鹽少許而飲之者。又云。男摘二九粒。

女摘一九粒以酒嚙者大能辟惡也。

小春

十月內。五京進紙造小衣甲并鎗刀器械各一萬副。十五日一時進埽國主與押番臣密望木葉山奠酒拜用番字書狀一紙同焚燒。奏木葉山神云。寄庫北呼此時為戴辦。漢人譯云。戴是燒辦是甲。

冬至

冬至日。國人殺白馬白羊白鴈各取其生血和酒。國主北望拜黑山。奠祭山神。言契丹死魂為黑山神所管。又彼人傳云。凡死人悉屬此山神所管。富民亦然。契丹黑山如中國之岱嶽云。北人死魂皆歸此山。每歲五京進人馬紙甲各萬餘事。祭山而焚之。其禮甚嚴。非祭不敢近山。

臘月

臘月。國主帶月戎裝。應番漢臣諸司使已上並戎裝。五更三點坐朝動樂飲酒罷。各等第賜御甲羊馬。北呼此節為鈔離忒。漢人譯云。鈔離是戰忒是時是戰時也。

詔盜

五月十三日。放國人作賊三日。如盜及十貫以上。依法行遣。北呼為鶻里忒。漢人譯云。鶻里是偷。忒是時也。

行軍

契丹行軍不擇日。用艾和馬糞於白羊琵琶骨上灸。灸破便出行。不破即不出。

午日

契丹出軍。每遇午日起程。如不用兵。亦須望西大喊三聲行之。彼言午。是北朝大王之日。

旋風

契丹人見旋風合眼。用鞭望空打四十九下。口中道坤不刻。七聲。

舍利

契丹國內富豪民。要裹頭巾者。納牛駝十頭。馬百疋。并給契丹名目。謂之舍利。

跪拜

凡男女拜。皆同。其一足跪一足著地。以手動為節。數止於三四。彼言捏骨地者。即跪也。

長白山

長白山在冷山東南千餘里。蓋白衣觀音所居。其山內禽獸皆白。人不敢入。恐穢其間。以致蛇虺之害。黑水發源於此。舊云粟末河。太宗破靺鞨。改為混同江。其俗剝木為舟。長可八尺。形如梭子。曰梭船。上施一槳。止以捕魚。至渡車則方舟。或三舟。

澤蒲

西樓有蒲瀕水。叢生一葉如柳。長不盈尋丈。用以作箭。不矯作而堅。左氏所謂董澤之蒲是也。

回鶻豆

回鶻豆高二尺許。直幹有葉。無旁枝。角長二寸。每角止兩豆。一根才六七角。色黃。味如栗。

螃蟹

渤海螃蟹。紅色。大如碗。螯巨而厚。其脆如中國蟹。螯巖舉。鮫魚之屬。皆有之。

葉隆禮撰

古今說海

金志

說選十一 偏記八

初興本末

金國本名朱里真。番語古音。訛為女真。或曰慮真。避契丹興宗名。又曰女直。肅慎氏遺種。渤海之別族也。或曰。三韓辰之役。挾氏於此地中。最微且賤。唐貞觀中。靺鞨來中國。始聞女真之名。世居混同江之東。長白山下。其山乃鴨綠水源。南鄰高麗。北接室韋。西界渤海。鐵離東瀕海。三國志所謂挹婁。元魏所謂句吉。唐所謂黑水靺鞨者。今其地也。其屬分六部。有黑水部。即今女真。其水掬之。則色微黑。契丹目為混同江。深二十丈餘。狹處可六七十步。濶者至百步。居江之南者。謂之熟女真。以其服屬契丹也。江之北者。謂之生女真。亦臣服於契丹。後有酋豪。受宣命為首領。號太師契丹。自賓州混同江北八十里。建寨以守。又云。契丹乘唐衰。併吞諸番。三古六女真在其間。契丹恐女真為患。誘豪石數千家。處之遼陽之南。而著籍焉。分其勢。使不得與本國通。謂之合蘇款。自咸州東北分界。入宮口。主東沫江。中間所居之女真。咸隸兵馬司。與其國往來無禁。謂之回霸抵凌。而野居者。謂之黃頭女真。又居東沫江之北。寧

州江之東地方千餘里。人戶十餘萬。無大君長。亦無國名。止是族帳。散居山谷間。自推豪傑為酋長。小者千戶。大者數千戶。蓋七十二部落之一也。僻處契丹東北隅。臣屬一百餘年。世襲節度使。兄弟相傳。週而復始。或又云其初酋長本新羅人。號完顏氏。完顏猶漢言王也。女真妻之以女。生二子。其長即胡來也。其自此傳三人以至阿骨打。以其國產金。及有金水源。故稱為大金。

初興風土

女真在契丹東北隅。地饒裕。山林田宜。麻穀土產。人參。蜜蠟。北珠。生金。細布。松實。白附子。禽有鷹鷂。海東青之類。獸多牛馬麋鹿。野狗。白兔。青鼠。貂鼠。其人勇悍。好詐。貪婪。殘忍。善騎射。喜耕種。好漁獵。每見野獸之蹤。躡而求之。能得其潛藏之所。又以樺皮為角。吹作呦呦之聲。呼麋鹿而射之。其居多依山谷。聯木為柵。或覆以板。與梓皮如墻壁。亦以木為之。冬極寒。屋纔高數尺。獨開東南一扉。扉既掩。復以草綢繆塞之。穿土為床。煨火其下。而寢食起居其上。厚毛為衣。非入室不撤衣。衣履稍薄。則墮指裂膚。雖盛夏如中華。初冬俗勇悍。喜戰鬪。耐饑渴。苦辛。騎上下崖壁如飛。濟江河不用舟楫。浮馬而渡。其樂惟鼓笛。其歌惟鷓鴣曲。第高下長短如鷓鴣聲而已。其疾病